

05 FEB 2000

Lim-MCA

GERAKAN GESA MCA DISIPLINKAN DUA LIM

KUALA LUMPUR, 5 Feb (Bernama) -- Gerakan menggesa MCA supaya mendisiplinkan dua Lim yang melompat ke parti itu bulan lepas, kata presidennya Datuk Seri Dr Lim Keng Yaik.

Beliau berkata Gerakan akan bertindak balas jika kedua-dua Lim itu mengganggu kepimpinan Ketua Menteri Pulau Pinang Tan Sri Koh Tsu Koon atau anggota Exco Gerakan di negeri itu.

"Mereka ini (Lim) tidak ada disiplin, tidak matang dan mementingkan diri sendiri dan saya beri amaran agar mereka tidak terus mengganggu Koh dan anggota Exco Gerakan di Pulau Pinang.

"Jika mereka lakukan juga, saya anggap tindakan mereka sebagai tidak berniat baik dan saya akan bertindak balas, begitu juga Gerakan," kata beliau kepada pemberita pada perjumpaan Tahun Baru Cina parti itu, di sini.

Anggota Dewan Undangan Pulau Pinang kawasan Datuk Keramat dan Bayan Lepas Lim Boo Chang dan Lim Chien Aun yang memenangi kerusi itu atas tiket Gerakan meninggalkan parti itu tiga hari selepas pilihan raya umum, sebelum menyertai MCA pada 25 Jan lepas.

Dengan kemasukan dua Lim ke MCA, parti itu kini mempunyai 11 kerusi dalam dewan undangan negeri diikuti Umno (10), Gerakan (8) dan MIC (1). Parti pembangkang dari DAP, PAS dan Keadilan, masing-masing mempunyai satu kerusi.

Ketika diminta mengulas hubungan antara Gerakan dan MCA sekarang, Dr Lim ia tetap baik seperti biasa.

"Saya hadir majlis Tahun Baru Cina MCA hari ini dan presiden MCA Datuk Seri Dr Ling Liong Sik juga hadir perjumpaan Tahun Baru Cina Gerakan," kata beliau.

Perdana Menteri Datuk Seri Dr Mahathir Mohamad turut hadir pada majlis Tahun Baru Cina Gerkan pukul 12 tengah hari.

Hadir sama ialah presiden MIC Datuk Seri S. Samy Vellu, presiden Parti Bansa Dayak Datuk Amar Leo Moogie, Pemangku Ketua Pergerakan Pemuda Umno Datuk Hishammuddin Tun Hussien dan Ketua Pemuda MCA Datuk Ong Tee Keat.

-- BERNAMA

NY zb